

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya
No. Telefon : 03-8882 5562
No. Fax : 03-8882 5569

PELAN ANTI RASUAH NASIONAL GANTI PELAN INTEGRITI NASIONAL UNTUK DILAKSANAKAN DALAM TEMPOH LIMA TAHUN

PUTRAJAYA, 11 FEBRUARI 2019 - Pelan Anti Rasuah Nasional (NACP) 2019 – 2023 yang dilancarkan pada 29 Januari 2019 dibangunkan bagi menggantikan Pelan Integriti Nasional (PIN).

NACP adalah pelan yang dibangunkan khusus untuk dilaksanakan dalam tempoh lima tahun. Ia diputuskan dalam Mesyuarat Jawatankuasa Khas Kabinet Mengenai Anti Rasuah (JKKMAR) pada 8 Jun 2018 lalu yang dipengerusikan oleh YAB Perdana Menteri, Tun Dr. Mahathir Mohamad.

Bertemakan '**Memecah Rantaian Rasuah**', pelan khusus ini dibangunkan bagi menetapkan sasaran yang praktikal berdasarkan inisiatif yang akan diambil oleh setiap agensi kerajaan dan swasta dalam menangani masalah rasuah, integriti dan tadbir urus untuk tempoh lima tahun akan datang.

Dalam menilai risiko rasuah, enam (6) bidang telah dikenalpasti sebagai bidang keutamaan yang cenderung kepada rasuah iaitu politik, perolehan awam, penguatkuasaan undang-undang, pentadbiran sektor awam, perundangan dan kehakiman serta tadbir urus korporat. Di peringkat KPDNHEP, Menteri dan Timbalan Menteri merupakan *champion* dalam menyampaikan mesej anti rasuah. KSU juga akan memainkan peranan yang penting bersama Pengarah Integriti dengan melibatkan Bahagian Pengurusan Integriti Agensi, SPRM yang mengawal selia Unit Integriti sektor awam dan swasta.

Selain daripada itu, dalam usaha membanteras rasuah Kerajaan juga melalui Pusat Governans, Integriti dan Anti Rasuah Nasional (GIACC) dengan kerjasama United Nations Development Programme (UNDP) sedang melaksanakan projek pemerkasaan governans. Salah satu komponen projek tersebut adalah merancang program rintis peringkat nasional iaitu Pelaksanaan Pensijilan MS ISO 37001:2016 ABMS di tiga (3) peringkat Kerajaan Malaysia iaitu Kerajaan Persekutuan, Kerajaan Negeri dan Kerajaan Tempatan. Kementerian Perdagangan Dalam Negeri dan Hal Ehwal Pengguna (KPDNHEP) merupakan antara tiga (3) kementerian yang terpilih untuk Pelaksanaan Pensijilan MS ISO 37001 ABMS. Dua Kementerian lain adalah Kementerian Kesihatan Malaysia (KKM) dan Kementerian Pertahanan (MINDEF). Majlis perhimpunan bagi bulan Februari 2019 ini, turut dihadiri Timbalan Menteri KPDNHEP, Tuan Chong Chien Jen, Ketua Setiausaha, Datuk Muez Abd Aziz, kedua-dua Timbalan Ketua Setiausaha. Ia dianjurkan Bahagian Penyelidikan dan Dasar Kepenggunaan KPDNHEP serta agensi KPDNHEP iaitu Suruhanjaya Persaingan Malaysia (MYCC).

-TAMAT-